


ANG
TINAGO SA
DIOS

PINADAYAG 10:7



Listahan Sa Mga Hilisgutan

MGA HILISGUTAN



2 Ang Supernatural

8 Paghukom

12 Ang Ngalan

16 Pagkahuman Sa Kinabuhi

22 Ang Orihinal Nga Kasal-anan

28 Ang Makalilisang Nga Adlaw Sa Ginoo

34 Ang Pulong

www.angmensahe.org

o

VOICE OF GOD RECORDINGS

019 St. MARY St., BARANGAY E. RODRIGUEZ SR.
CUBAO, QUEZON CITY, METRO MANILA, PHILIPPINES

NAGABUHAT PA BA SA GIHAPON ANG DIOS OG GAMHANANG MGA BUHAT SAMA SA IYANG GIBUHAT KANIADTO DIHA SA BIBLIA?

GIPANGUTANA MO NA BA ANG IMONG KAUGALINGON KON NGANO NGA KINAHANGLAN KANG MABAUTISMOHAN?

TUNGOD BA NGA IKAW USA KA MIYEMBRO SA USA KA IGLESIA, NAGAPASABOT BA KANA NGA IKAW LUWAS NA?

UNSA BA GYUD ANG NAHITABO TALI SA SERPENTE UG NI EVA DIDTO SA TANAMAN SA EDEN?

NAHIBALO KA BA NGA NAGSAAD ANG BIBLIA NGA ANG MGA TINAGO SA DIOS MATUMAN NA SA NIINING KAULAHANG MGA ADLAW?

PANAHON NA ARON ANG MGA TINAGO MABUKSAN NA UG MAIPAHAYAG SA KALIBUTAN.

ANDAM KA BANG MADUNOG ANG TINUOD NGA PULONG SA DIOS?

Apan sa mga adlaw sa tingog sa ikapito ka manolunda, sa diha nga siya buot magtingog, unya ang **tinago** sa Dios matuman na, sumala sa iyang gipahibalo ngadto sa iyang mga ulipon nga mga propeta. PINADAYAG 10:7

Ang Supernatural

JUAN 14:12

*SA PAGKAMATUOD, SA PAGKAMATUOD,
NAGAINGON AKO KANINYO, ANG NAGATOO
KANAKO, MAGABUHAT SA MAO USAB NGA
MGA BUHAT NGA GIBUHAT KO; UG
PAGABUHATON NIYA ANG LABAW PA NIINI;
KAY AKO MOADTO SA AKONG AMAHAN.*

MARCOS 16:17-18

*UG KANILA NGA NAGATOO MAGANUNOT KINING MAONG MGA ILHANAN; SA
AKONG NGALAN ILANG PAGULAON ANG MGA YAWA; MAGASULTI SILA OG MGA
BAG-ONG SINULTIHAN;*

*MAKAKUPOT SILA'G MGA BITIN; UG KON MAKAINOM SILA OG BISAN UNSA NGA
MAKAHILO, DILI SILA MANGADAUT; ANG MGA MASAKITON PAGAPANDONGAN
NILA SA ILANG MGA KAMOT, UG MANGAAYO ANG MGA NIINI.*

Mahimo natong tanan nga buksan ang mga panid sa Biblia ug makita nga nagabuhat ang Dios og mga milagro: gibahin ni Moises ang Dagat nga Mapula, mitawag si Elias og gutom, milakaw si Jesus ibabaw sa tubig, ug ang mga tinun-an nanagpang-ayo og mga masakiton.

Adunay linibo nga mga milagrong nahitabo nga nasulat diha sa Biblia. Kung nagapamatuod ang Dios *pinaagi sa mga ilhanan ug mga katingalahan*, kung ingon-ana asa na ang iyang mga milagro sa karong panahon? Mahimo ba Niyang ayohon ang kanser sama sa pag-ayo Niya kaniadto sa sanla diha sa Biblia? Unsa na man diay ang mahitungod sa AIDS o malaria? Makahimo pa ba Siya sa gihapon og milagro? Oo, nagapamuhat sa gihapon ang Dios og mga milagro ug *kini nga mga ilhanan naganunot sa kadtong mga nagatoo*.

Karon, tan-awa ninyo mga higala, hunahunaa lang si Haring George sa Englatera, sa dihang giayo siya gikan sa multiple sclerosis, niadtong miampo kami alang kaniya. Hunahunaa lang si Florence Nightingale, (ang iyang lola, ang nagtukod sa Red Cross), mga saisenta lang ka libra ang gibug-aton, naghigda didto nga himalatyon na tungod sa kanser sa tungol, nagahigda nga himalatyon na. Usa ka gamay'ng salampati ang milupad ngadto sa sapinit didto ug mikunsad ang Espiritu sa Dios ug miingon, "MAO KINI ANG GINAINGON SA GINOO, mabuhi siya." Ug karon nagtimbang na siya og usa ka gatus ug singkwenta ka libra nga anaa na sa hingpit nga panglawas.

Hunahunaa ninyo si Kongresman Upshaw nga nagapos kaniadto sa mga lingkuranan ug higdaanan sa daghang mga katuigan, sulod sa saisentay-sais ka tuig. Ug diha sa usa ra ka kalit nga panahon mitindog, midagan sa tibuok nga bilding, gihikap ang iyang mga tudlo sa tiil, bug-os nga nahimo nang normal ug giayo na.

Hunahunaa lang ninyo ang linibo ug linibo sa mga tawo nga gipang-ayo. Nganong mopabalina ra kita dinhi hangtud kitang mamatay? Magbuhat kita og usa ka butang bahin niini.

Magtoo ka kung aduna ka'y sakit o anaa sa panginahanglan. Nagaingon ang Biblia nga *Jsi Jesus Cristo mao sa gihapon kagahapon, ug karon, ug hangtud sa kahangturan*, busa kung nahimo Niya ang pagbuhat og milagro duha ka libo ka tuig kaniadto, kung ingon-ana mahimo Niya usab nga buhaton ang mao rang butang sa karon. Nagsaad Siya nga giayo na Niya kita, kung *motoo lamang kita*.

Si William D. Upshaw

nagserbisyo og walo ka tuig sa Kamara sa mga Representante sa Estados Unidos og nagpapili sa pagkapresidente niadtong 1932. Usa ka aksidente sa pagpanguma ang nagparalisa kaniya sugod sa pagkabata pa lang, ug sulod sa 66 ka tuig nag-antus siya nga nakasungkod o nakawheelchair. Niadtong 1951, bug-os siya nga naayo ug hingpit na nga nakalakaw sa tanan nga nahibilin nga bahin sa iyang kinabuhi.




Si Florence Nightingale,

usa ka halayo na nga paryente sa usa ka nabantog nga nars, nagkaaduna kaniadtog og grabe nga kanser sa tungol. Iyang gipadala kini nga retrato ingon nga usa ka katapusang hangyo aron maiampo sa dili pa kuhaon sa kanser ang iyang kinabuhi. Sama sa inyong makita, atua siya nga nag-ungaw na sa kamatayon niadtong 1950 sa diha nga wala pa siya giayo ni Ginoong Jesus. Ang sunod nga retrato nakuha niadtong human na siyang naayo ug gipadala kini ingon nga usa ka pagpamatuod nga ang Dios nagapang-ayo sa gihapon og mga sakit.




Miadto si Tris Griffin

sa opisina sa doktor niadtong sayong bahin sa 2013 tungod sa gibati niya nga sakit sa likod nga gikahadlokang niya nga mahimong usa ka pagbalik sa iyang pagpakig-away sa kanser. Gipakita diha sa MRI ang usa ka "aortic dissection" sa iyang kasingkasing, nga miaghat sa mga doktor nga maghimo og dugang pa nga mga pag-eksamen ug gikatakda ang usa ka gilayon nga operasyon pagkasunod nga adlaw. Ang badlis diha sa kasingkasing nga anaa sa retrato usa ka klarong liki nga mahimong magkahulogan og usa ka hinanali ug halos sigurado gayud nga kamatayon kung mosiak kini.



Pagkasunod nga adlaw, human nga ang mga magtotoo nanag-ampo alang kaniya, ang mga doktor nagpahigayon og usa pa ka CT scan aron matumbok gayud ang nahimutangan mismo sa mao nga liki sa dili pa ang operasyon. Niining higayona, ang mga retrato nagpakita og usa na ka tuman ka mahimsog nga kasingkasing. Sa kakurat, miingon ang doktor kang Mrs. Griffin, "Wala ko kabalo kung unsay isulti ko kanimo. Nagkaaduna ka og usa ka aortic dissection, pero karon ang tanang ebidensiya niini wala na." Gipakita niya ngadto kaniya ang maong mga retrato sa wala pa himoa ang pag-ampo, ug dayon pagkahuman niini. "Mahimo ka na nga makalakaw, ug lain pa'y akó, wala na gyu'y timailhan sa kanser. Anaa ka na sa hingpit nga panglawas."



(sa wala) Nakapunting ang pangtudlo sa doktor ngadto sa aorta, ang maitum, lingin nga dapit sa tunga sa retrato. Ang diyagonal nga linya diha niini maoy aneurism, o "dissection" sa aorta, nga nagakinahanglan og gilayon nga operasyon ug makamatay pag-masiak kini. (sa ibabaw) Gipahigayon ang ikaduhang pag-scan pagkasunod nga adlaw. Ang mao nga dissection bug-os na nga nawala ug wala na gayud mibalik.

Mga Pakisayran Niini

SALMO 103:2-3

Dayegon mo ang GINOO, Oh kalag ko, ug ayaw hikalimti ang tanan niyang mga kaayohan: Nga mao ang nagapasaylo sa tanan mong kasal-anan; nga mao ang nagaayo sa tanan mong mga balatian;

ISAIAS 53:5

Apan siya ginasamaran tungod sa atong kalapasan, siya napangos tungod sa atong mga kasal-anan: ang silot sa atong pakigdait diha sa ibabaw niya; ug tungod sa iyang mga labod kita nangaayo.

MARCOS 16:17

Ug kanila nga nagatoo maganunot kining maong mga ilhanan; Sa akong ngalan pagahinginlan nila ang mga yawa; magasulti sila og mga bag-ong sinultihan;

LUCAS 17:6

Ug ang Ginoo miingon, Kung kamo adunay pagtoo nga ingon sa usa ka lugas nga mostaza, magaingon kamo niining kahoy'ng sicomor, Maibut ka sa gamut, ug matanum ka sa dagat; ug kana magasugot kaninyo.

JUAN 14:12

Sa pagkamatuod, sa pagkamatuod, nagaingon ako kaninyo, Ang nagatoo kanako, magabuhat sa mao usab nga mga buhat nga gibuhat ko; ug pagabuhaton niya ang labaw pa niini; kay ako moadto sa akong Amahan.

I MGA TAGA-TESTALONICA 1:5

Kay ang among maayong balita wala moabot kaninyo sa pulong lamang, kondili usab sa gahum, ug sa Espiritu Santo, ug sa daku nga kasayuran; bisan ingon sa hingsayran ninyo kung daw sa unsa kami nga diha kaninyo, tungod kaninyo.

MGA HEBREOHANON 2:3-4

Unsaon ta sa paglikay, kung talikdan ta ang ingon nga pagkadaku nga kaluwasan; nga sa sinugdan gipamulong sa Ginoo, ug unya gipanghimatuod kanato pinaagi kanila nga mga nakadungog kaniya;

Ang Dios usab nagsaksi niini, pinaagi sa mga ilhanan ug mga katingalahan, ug sa nagkalainlaing mga milagro, ug pinaagi sa mga gasa sa Espiritu Santo, sumala sa iyang kaugalingong kabubut-on?

MGA HEBREOHANON 13:8

Si Jesus Cristo mao sa gihapon kagahapon, ug karon, ug hangtud sa kahangturan.

SANTIAGO 5:15

Ug ang pag-ampo nga inubana'g pagtoo magaaayo sa masakiton, ug siya pagabangonon sa Ginoo; ug kon siya nakasala man, siya pagapasayloon.

I PEDRO 2:24

Nga siya sa iyang kaugalingon mao ang nagdala sa atong mga sala diha sa iyang lawas ibabaw sa kahoy, aron kita, nga nangamatay na ngadto sa sala, mabuhi ngadto sa pagkamatarung: pinaagi sa iyang mga samad nangaayo kamo.

PAGHUKOM

SALMO 96:13

SA ATUBANGAN SA GINOO: KAY

MOABOT NA SIYA, KAY SIYA MOANHI

SA PAGHUKOM SA YUTA: PAGAHUKMAN

NIYA ANG KALIBUTAN UBAN ANG

PAGKAMATARUNG, UG ANG KATAWOHAN

UBAN ANG IYANG KAMATUORAN.

Adunay linibo ka nagkalainlaing mga denominasyon sa kalibutan karon. Ginakondena sa matag usa ka relihiyon ang uban niini, apan bisan pa niana silang tanan nagasaad og kaluwasan pinaagi sa *ilang* denominasyon. Unsaon man nato pagkahibalo kon hain sa mga niini ang pilion?

Kon pilion nato ang iglesiang Katoliko, kung ingon-ana ginadawat nato ang *pagpangamuyo ngadto sa mga santo*, nga walay lain kondili pag-ampo ngadto sa mga diosdios. Nagaingon ang Biblia, "*Kay adunay usa ra ka Dios, ug adunay usa ra ka tigpataliwala sa Dios ug sa mga tawo, nga mao ang tawo nga si Cristo Jesus;*" (I Tim 2:5). Ginatawag ang pari nga "Father" nga gidili ni Jesus diha sa Mat 23:9: "*Ug dili kamo magtawag bisan kinsang tawo nga amahan ninyo sa ibabaw sa yuta: kay usa lamang ang inyong Amahan, ang atua sa langit.*" Ginasulti kanato sa Assemblies Of God nga ang pagsulti kono diha sa laing mga dila mao ang labing unang ebidensiya sa Espiritu Santo, sa dihang nag-ingon si Pablo, "*Kon ako tigpanulti'g mga dila sa mga tawo ug sa mga manolunda, apan*

walay gugma, ako usa lamang ka masaba nga agong, o piyangpiyang nga nagatagingting." (I Mga Taga-Cor 13:1)

Gilayon nga isulti kanato sa halos tanang mga denominasyon nga daghang mga butang diha sa Biblia ang gi-interpretar og sayup, nangawala diha sa paghubad, o dili na magamit sa pangkaron nga kalibutan. Busa, angay ba natong toohan ang Biblia o ang mga denominasyonhong doktrina? Unsa ma'y gamiton sa Dios ingon nga usa ka sukaranan sa paghukom?

Kon pangutan-on ko ang mga Katoliko dinhi karong gabhiona, "Unsa man sa hunahuna ninyo ang pagagamiton sa Dios nga panghukom sa kalibutan?" Moingon ang mga Katoliko, "Pinaagi sa Simbahang Katoliko." Sige, unsa man nga Simbahang Katoliko? Karon aduna na sila og Romano, Greek Orthodox, ug daghan pa kanila. Hain kaha kini nga Simbahang Katoliko? Moingon ang mga Lutheran, "Pinaagi lang kanamo," kung ingon-ana wala na kamong mga Baptist. Ug dayon kung moingon kita, "Pinaagi lamang sa Baptist," kung ingon-ana wala na kamong mga Pentecostal. Mao nga magkaaduna og dakung kalibog, walay mahibalo kung unsa ang buhaton; busa wala gayud Siya misaad nga hukman ang kalibutan pinaagi sa iglesia.

Misaad Siya nga hukman ang kalibutan pinaagi ni Cristo, ug si Cristo mao ang Pulong. Ug ang Biblia ang maoy magahukom sa kalibutan, nga mao si Jesus Cristo ang mao sa gihapon kagahapon, karon, ug hangtud sa kahangturan.

Mga Pakisayran Niini

JUAN 1:1

Sa sinugdang mao ang Pulong, ug ang Pulong kauban sa Dios, ug ang Pulong mao ang Dios.

JUAN 1:14

Ug ang Pulong nahimong unod, ug nagpuyo ipon kanato (ug atong nakita ang iyang himaya, himaya ingon nga sa bugtong anak gikan sa Amahan,) pumo sa grasya ug sa kamatuoran.

JUAN 5:22

Kay ang Amahan dili magahukom kang bisan kinsa, hinonoa ang tanang paghukom gitugyan niya ngadto sa Anak:

JUAN 12:48

Ang nagasalikway kanako, ug wala modawat sa akong mga pulong, may magahukom kaniya: ang pulong nga akong giingon, maoy magahukom kaniya sa katapusan nga adlaw.

MGA TAGA-EFESO 1:5-7

Sa iyang gipili kita nga daan aron mahimong inangkon nga mga anak pinaagi kang Jesus Cristo ngadto sa iyang kaugalingon, sumala sa kahimut-an sa iyang kabubut-on, Alang sa pagdayeg sa himaya sa iyang grasya, nga sa-walay-bayad gihatag niya kanato diha sa hinigugma.

Nga kaniya anaa ang atong katubsanang pinaagi sa iyang dugo, ang pasaylo sa atong mga paglapas, sumala sa pagkadato sa iyang grasya;

MGA TAGA-EFESO 2:5-8

Bisan sa mga patay kita tungod sa atong mga kasal-anan, nagbuhi siya kanato uban kang Cristo, (pinaagi sa grasya nangaluwas kamo;)

Ug gibanhaw kita uban kaniya, ug gipalingkod kita uban kaniya sa mga langitnong dapit diha kang Cristo Jesus:

Aron nga sa mga katuigan nga umalabot makapahayag siya sa labaw gayud nga kadato sa iyang grasya sa kaayo nga alang kanato diha kang Cristo Jesus.

Kay tungod sa grasya kamo nangaluwas pinaagi sa pagtoo; ug kini dili sa inyong kaugalingong kahimoan: kini hatag sa Dios:

I JUAN 1:7

Apan kung magalakaw kita diha sa kahayag, maingon nga siya anaa sa kahayag, may kaambitan kita sa usa ug usa, ug ang dugo ni Jesus Cristo nga iyang Anak nagahinlo kanato gikan sa tanang sala.

PINADAYAG 22:18-19

Ako nagapamatuod sa tanan nga managpatalinghug sa mga pulong sa propesiya niining basahona, Kon adunay magadugang niini og bisan unsa, kaniya igadugang sa Dios ang mga hampak nga gihisgutan niining basahona:

Ug kon adunay magataktak og mga pulong gikan sa mga pulong sa basahon niining propesiya, pagataktakon sa Dios ang iyang bahin diha sa libro sa kinabuhi, ug diha sa balaang siyudad, ug sa mga butang nga nahasulat dinhi niining basahona.



Ang Ngalan

MARCOS 16:16

ANG NAGATOO UG

MAGPABAUTISMO MALUWAS;

APAN ANG WALA NAGATOO

PAGAHUKMAN SA SILOT.

MGA BUHAT 2:38

UG SI PEDRO MIINGON KANILA, MAGHINULSOL KAMO, UG MANAGPABAUTISMO ANG TAGSATAGSA KANINYO SA NGALAN NI JESUS CRISTO ALANG SA PAGPASAYLO SA MGA SALA, UG MADAWAT NINYO ANG GASA NGA ESPIRITU SANTO.

Tin-aw nga, ang bautismo importante kaayo, apan mahinungdanon ba *kung giunsa* kita sa pagbautismo? Aduna ba'y hustong bautismo, o okey na ang bisan unsa na lang? Kung nagatoo ka sa Biblia, kung ingon-ana OO, aduna gyu'y hustong bautismo.

Kadaghanan sa mga kaiglesiahan nagabautismo sa Ngalan sa Amahan, Anak, ug Espiritu Santo, apan dili kini husto sumala sa Biblia.

Diha sa Mga Buhat 19, adunay mga tawo nga nanagtoo na kang Jesus Cristo, apan wala pa nadawat ang Espiritu Santo ngadto sa ilang mga kasingkasing. Kabalo ang apostol nga si Pablo kaniadto sa hustong paagi aron madawat ang Espiritu Santo, busa iya silang gipangutana, "*Ngadto ba diay sa unsa ang pagbautismo kaninyo?*" Ug miingon sila, "*Ngadto sa bautismo ni Juan.*" (Mga Buhat 19:3) Nakita ni Pablo nga wala sila nabautismohan sumala kaniadto sa sugo ni Pedro diha sa Mga Buhat 2:38, busa gisugo niya sila nga magpabautismo pag-usab sa Ngalan ni Ginoong Jesus. Dayon, ingon sa gisaad na, nadawat nila ang Espiritu Santo.





Busa, ngano nga nagpangbautismo man ang mga tinun-an kaniadto sa Ngalan ni Jesus sa dihang si Jesus, Mismo, ang miingon kanila nga magbautismo sa **Ngalan** (dili sa “mga ngalan”) sa Amahan, ug sa Anak, ug sa Espiritu Santo? (Matt 28:19) Nangasayup ba sila? Wala! Ilang gibuhat sa eksakto kung unsa ang gisugo kanila.

Samtang ginabasa mo kini nga artikulo, hunahunaa ang imong ngalan. Usa ba ikaw ka anak? Ang ngalan mo ba, “Anak”? Usa ba ikaw ka inahan? Ang ngalan mo ba, “Inahan”? Siyempre dili, mga titulo lang kana. Aduna ka’y tinuod nga ngalan, ug mao usab ang Dios.

Ania ang tubag:

Ug walay ingon-anang butang sa Biblia sama sa kang kinsa man nga nabautismohan sa ngalan sa Amahan, Anak, Espiritu Santo; tungod kay wala og ingon nianang butang. Ang Amahan dili ngalan; ug ang Anak dili ngalan; ug ang Espiritu Santo dili ngalan; apan ang Ngalan sa Amahan, Anak, Espiritu Santo mao ang Ginoong Jesus Cristo.

Si Jesus Cristo mao ang Dios! Siya mao ang Amahan, ang Anak, ug ang Espiritu Santo.

Kung ginapangita mo ang Espiritu Santo ug nagahunahuna kon ngano nga wala pa kini gihatag sa Ginoong kanimo, kung ingon-ana mahimo nga gusto mong ipangutana sa imong kaugalingon ang mao usab nga pangutana nga gipangutana kaniadto ni Pablo, “Ngadto ba diay sa unsa ang pagbautismo kanimo?”

Mga Pakisayran Niini

MATEO 28:19

Busa panglakaw kamo, ug himoa ninyong mga tinun-an ang tanang kanasuran, sa pagpamautismo kanila sa ngalan sa Amahan, ug sa Anak, ug sa Espiritu Santo: [Unsa man ang Ngalan sa Amahan? Ang Ngalan sa Anak? Ang Ngalan sa Espiritu Santo?]

MARCOS 16:16

Ang nagatoo ug ang magpabautismo maluwas, apan ang dili nagatoo pagahukman sa silot.

JUAN 5:43

Ako mianhi sa ngalan sa akong Amahan, ug kamo wala modawat kanako: kung lain ang moanhi sa iyang kaugalingon nga ngalan, siya pagadawaton ninyo. [Kung siya mianhi sa Ngalan sa Amahan, kung ingon-ana unsay Iyang Ngalan?]

JUAN 10:30

Ako ug ang Amahan usa ra.

JUAN 12:45

Ug ang makakita kanako makakita sa nagsugo kanako.

JUAN 14:8-9

Si Felipe miingon kaniya, Ginoong, ipakita kanamo ang Amahan, ug igo na kana kanamo. Si Jesus miingon kaniya, Kadugay na nga ania ako uban kaninyo, ug wala ka pa diay makakita kanako, Felipe? ang nakakita kanako nakakita sa Amahan; ug naunsa bang miingon man ikaw, ipakita kanamo ang Amahan?

JUAN 20:27-28

Unya miingon siya kang Tomas, Iabut ngari ang imong tudlo, ug tan-awa ang akong mga kamot; ug iabut ngari ang imong kamot, ug ihinol kini sa akong kilid: ug dili ka magmaduhaduhaon, kondili magmatinoohon.

Ug si Tomas mitubag ug miingon kaniya, Ginoong ko ug Dios ko.

MGA BUHAT 2:38-39

Ug si Pedro miingon kanila, Maghinulsol kamo, ug managpabautismo ang tagsatagsa kaninyo sa ngalan ni Jesus Cristo alang sa pagpasaylo sa mga sala, ug madawat ninyo ang gasa nga Espiritu Santo. Kay ang saad alang kaninyo, ug sa inyong mga anak, ug sa tanan nga atua sa halayo, bisan ang kapid-an nga pagatawgon sa atong Ginoong Dios.

MGA BUHAT 4:12

Ug walay kaluwasan pinaagi kang bisan kinsa pa nga lain: kay walay bisan unsa pang lain nga ngalan sa silong sa langit nga gikahatag ngadto sa mga tawo, nga pinaagi niini maluwas kita.

MGA BUHAT 8:12

Apan sa diha nga nagpanoo na sila kang Felipe sa pagmantala niya sa Maayong Balita mahitungod sa gingharian sa Dios, ug sa ngalan ni Jesus Cristo, nanagpabautismo sila, nga mga lalaki ug mga babaye.

MGA BUHAT 19:3-6

Ug siya nangutana kanila, Ngadto ba diay sa unsa ang pagbautismo kaninyo? Ug sila nanag-ingon, Ngadto sa bautismo ni Juan.

Ug si Pablo miingon, Si Juan nagbautismo sa bautismo sa paghinulsol, nga nag-agda sa katawhan, nga managtoo sila sa moabot sa ulahi niya, sa ato pa, kang Cristo Jesus.

Ug sa ilang pagkadungog niini, sila gipangbautismohan sa ngalan sa Ginoong Jesus.

Ug sa napandongan na sila ni Pablo sa iyang mga kamot, ang Espiritu Santo mikunsad kanila; ug sila nanagpanulti sa laing mga pinulongan, ug nanaghimo’g mga propesiya.

MGA TAGA-EFESO 4:5

Usa ka Ginoong, usa ka pagtoo, usa ka bautismo,

MGA TAGA-COLOASAS 3:17

Ug bisan unsay inyong pagabuhaton sa pulong o sa buhat, buhata ang tanan sa ngalan sa Ginoong Jesus, nga nagahatag og pagpasalamat ngadto sa Dios nga Amahan pinaagi kaniya.

I JUAN 5:7

Kay adunay tulo nga nagapamatuod sa langit, ang Amahan, ang Pulong, ug ang Espiritu Santo: ug kining tulo usa ra.

Pagkahuman Sa Kinabuhi

JUAN 5:28-29

AYAW KAHIBULONG NIINI: KAY ANG
TAKNA MOABOT, NGA ANG TANAN
NGA ANAA SA MGA LUBNGANAN
MAKADUNOG SA IYANG TINGOG,
UG MANAGPANGGULA; ANG MGA
NANAGBUHAT SA MAAYO, NGADTO SA
PAGKABANHAW SA KINABUHI; UG ANG
MGA NANAGBUHAT SA DAUTAN, NGADTO
SA PAGKABANHAW SA PAGHUKOM.

Moabot ang adlaw kon diin ang matag usa kanato, Cristohanon man o dili, makahibalo na gayud sa eksakto kung unsa ang anaa sa likod niining tabil sa panahon. Ang Biblia nagasaad og Kinabuhing Walay Katapusan ngadto sa pipila, ug sa uban usab, nagasaad kini og kalaglagan. Ang matag tawo sa tibuok kasaysayan siguradong nangutana na sa iyang kaugalingon,

“Unsa kaha ang mahitabo kanako sa dihang mamatay na ako?”

Dugay na kaniadto nga wala pa og Biblia nga mabasa, ang propeta nga si Job nagbantay na sa kinaiyahan. Naghisgot siya mahitungod sa paglaum sa usa ka kahoy, kung unsa nga putlon kini ug mamatay, pero bisan pa niana ug tungod sa baho lang sa tubig, nagabalik ang kinabuhi niini ug

manalingsing kini og bag-ong mga udlot. Nasayod si Job nga ang tawo, sama sa kahoy, mabuhi pag-usab:

Kung ang tawo mamatay, mabuhi ba siya pag-usab? paabuton unta nako ang tanang adlaw sa akong pagpakigbisog, hangtud ang akong pagkabalhin modangat.

Ikaw motawag unta, ug kanimo ako motubag: ikaw mokinahanglan sa buhat sa imong mga kamot.

Apan karon imong ginaihap ang akong mga lakang: dili ba ikaw magtimaan sa akong sala? (Job 14:14-16)

Mahimong wala si Job kaniadto og Biblia nga mabasa, apan nasayod siya nga sa usa ka adlaw pagabanhawon siya sa Dios gikan sa lubnganan sa diha nga moabot na ang Manunubos sa katawohan.

Oh nga gisulat unta karon ang akong mga pulong! oh nga nahamutang unta sila sa usa ka basahon!

Nga sa tinalinsan nga puthaw ug tingga magapatik kanila sa ibabaw sa usa ka bato nga walay katapusan.

Apan alang kanako nasayod nga ang akong manluluwas buhi man, ug sa kaulahian nga adlaw siya motindog sa ibabaw sa yuta:

*Ug sa tapus ang akong panit kining lawas ko gayud malaglag, **unya sa wala ang akong unod makita ko ang Dios:*** (Job 19:23-26)

Nagahisgot ang maong propeta mahitungod kang Ginoong Jesus ug ang pagkabanhaw sa Iyang mga katawhan. Nasayod si Job pinaagi og kapadayagan nga bisan pa nga ang atong mga lawas bug-os man nga

matun-as, igabalik ni Jesus ang atong mga lawas. Ug sa ato mismong mga mata, makita nato ang Iyang Pag-abot. Ginapangandoy gayud sa tanang mga tawo sa Dios kana nga mahimayaong adlaw.

Pero, kung unsa ka sigurado nga adunay Dios, aduna usab og yawa; ug kung unsa ka sigurado nga adunay Langit, aduna usab og impiyerno. Ang mga ganti mas hataas kay sa mahimo natong hunahunaon. Ang apostol nga si Pablo nag-ingon nga, "*Ang wala makita sa mata, ni madungog sa dalunggan, ni mosantop sa kasingkasing sa tawo, ang gikatagana sa Dios alang kanila nga nahigugma kaniya.*" (I Mga Taga-Cor. 2:9)

Dili arang matugkad sa atong mga hunahuna kung unsa katahum ang Langit, ug dili usab nila arang matugkad ang kalisang sa impiyerno. Gisulti kanato ni Jesus nga makalilisang kaayo ang impiyerno nga mas maayo pa kung putlon nato ang usa ka bahin sa atong lawas kay sa mopaingon kita ngadto nianang makahahadlok nga lugar.

Ug kon ang imong kamot mao ang magapangdol kanimo, putla kini: labi pang maayo kanimo nga mosulod ka sa kinabuhi nga pungkol, kay sa may duha ikaw ka mga kamot nga moadto ka sa impiyerno, ngadto sa kalayo nga dili arang mapalong: (Marcos 9:43)

Busa kinsa man diay ang mopaingon sa Langit? Ug kinsa ang mopaingon sa impiyerno? Masubo kini hunahunaon, apan nag-ingon si Jesus nga kadaghanan sa mga tawo dili makadawat sa ganti nga andam Niyang igahatag: *Sumulod kamo agi sa pultahan nga masigpit: kay daku ang pultahan, ug sangkad ang dalan, nga nagahatud ngadto sa pagkalaglag, ug daghan ang*

*nagasulod agi niini: Kay masigpit ang pultahan, ug hiktin ang dalan, nga padulong sa kinabuhi, **ug diyutay ra ang mga nakatultol niini.*** (Mat 7:13-14)

Nag-ingon usab si Jesus, "***Dili ang tanan nga nagaingon kanako, Ginoo, Ginoo, makasulod sa gingharian sa langit;** kondili kadtong nagabuhat sa kabubut-on sa akong Amahan nga atua sa langit. Daghan ang magaingon kanako niadtong adlaw, Ginoo, Ginoo, wala ba kami magpanagna tungod sa imong ngalan? ug tungod sa imong ngalan ginahinginlan namo ang mga yawa? Ug tungod sa imong ngalan ginabuhat namo ang daghang mga katingalahan? Ug unya pagasaysayan ko sila, Wala ko gayud kamo maila: pahalayo kamo kanako, kamong mga mamumuhat sa kadautan.*" (Mat 7:21-23)

Tungod lang nga nagaangkon sa pagka-Cristohanon ang usa ka tawo wala kana nagakahulogan nga luwas na siya. Busa, kini ang tin-aw nga pangutana sa atong mga hunahuna: Unsaon ko man pagdawat og Kinabuhing Walay Katapusan? Gihatagan kita ni Jesus og usa ka yano kaayong tubag: *Sa pagkamatuod, sa pagkamatuod, nagaingon ako kaninyo, **Ang nagapatalinghug sa akong pulong, ug nagatoo kaniya nga nagsugo kanako, may kinabuhi nga walay katapusan,** ug dili pagahukman sa silot; kondili miagi na gikan sa kamatayon ngadto sa kinabuhi.* (Juan 5:24)

Intawon, aduna og pipila lang gayud ka mga tawo sa kalibutan karon ang andam nga mogahin og panahon gikan sa okupado nilang mga adlaw aron nga makapaminaw sa Pulong sa Dios. Ug aduna og mas gamay pa gayud ang motoo sa Pulong pagkadungog nila niini.

Ginasultihan kita sa mga kaiglesiahan nga magmahimong maayong tawo, manghunahuna og positibo, dili mamakak, manikas, o mangawat, ug mopaingon kita sa Langit. Wala nila masabtan nga ang impiyerno mamahimong puno sa mga tawo nga medyo nagkinabuhi og maayong mga pagkinabuhi. Ang tinuod niini mao nga dili kita mopaingon sa Langit tungod sa atong matarung nga mga binuhatan o tungod nga miyembro kita sa usa ka iglesia. Adunay usa lang ka dalan paingon ngadto sa Kinabuhing Walay Katapusan, ug kana maoy pinaagi kang Jesus Cristo. Gisugo Niya kanato nga kinahanglan MAGTOO kita sa Iyang Pulong, nga mao ang Biblia. Kay kon dili, unsaon man nato pagkaluwas?

Sa diha nga ang paghukom moabot na kanimo, madungog mo kaha ang, *“Umari ka, ikaw nga dinayeg sa akong Amahan, panunda ang gingharian nga gitagana alang kanimo sukad pa sa pagkatukod sa kalibutan,”* (Mat 25:34) o madungog mo kaha ang, *“Pahalayo kanako, tinunglo, ngadto sa kalayong walay katapusan, nga gitagana alang sa yawa ug sa iyang mga manolunda”?* (Mat 25:41)

Samtang nga ginabasa sa imong mga mata kini nga mga pulong, aduna ka’y pagdesisyonan: Pilion mo ba nga toohan ang Pulong sa Dios?

Asa mo ba igahin ang imong Walay Katapusan?

Mga Pakisayran Niini

JOB 14:12-16

Mao usab ang tawo mamatay, ug dili na mobalik: hangtud nga mawala ang kalangitan, sila dili na manghigmeta, dili usab sila mapukaw sa ilang pagkatulog.

Oh nga sa sheol unta tagoan mo ako, nga imo unta akong ibutang sa tago, hangtud nga mahupay ang imong kaligtugut, nga imo unta akong tagalan og panahon, ug mahinumdum ka kanako!

Kung ang tawo mamatay, mabuhi ba siya pag-usab? paabuton unta nako ang tanang adlaw sa akong pagpakigbisog, hangtud ang akong pagkabalhin modangat.

Ikaw motawag unta, ug kanimo ako motubag: ikaw mokinahanglan sa buhat sa imong mga kamot. Apan karon imong ginaihap ang akong mga lakang: dili ba ikaw magtimaan sa akong sala?

JOB 19:23-26

Oh nga gisulat unta karon ang akong mga pulong! oh nga nahamutang unta sila sa usa ka basahon! Nga sa tinalinsan nga puthaw ug tingga magapatik kanila sa ibabaw sa usa ka bato nga walay katapusan!

Apan alang kanako nasayod ako nga ang akong manluluwas buhi man, ug sa kaulahian nga adlaw siya motindog sa ibabaw sa yuta:

Ug sa tapus ang akong panit, kining lawas ko gayud malaglag, unya sa wala ang akong unod makita ko ang Dios:

MATEO 7:21-23

Dili ang tanan nga nagaingon kanako, Ginoo, Ginoo, makasulod sa gingharian sa langit; kondili kadtong nagabuhat sa kabubut-on sa akong Amahan nga atua sa langit.

Daghan ang magaingon kanako niadtong adlaw, Ginoo, Ginoo, wala ba kami magpanagna tungod sa imong ngalan? ug tungod sa imong ngalan ginahinginlan namo ang mga yawa? ug tungod sa imong ngalan ginabuhat namo ang daghang mga katingalahan?

Ug unya pagasaysayan ko sila, Wala ko gayud kamo maila: pahalayo kamo kanako, kamong mga mamumuhat sa kadautan.

MATEO 22:14

Kay daghan ang mga gipanawag apan diriyut ra ang mga napili.

JUAN 3:16-17

Kay gihigugma gayud sa Dios ang kalibutan, nga tungod niana gihatag niya ang iyang bugtong Anak, aron ang tanan nga nagatoo kaniya dili malaglag, kondili may kinabuhi nga walay katapusan.

Kay gipadala sa Dios ang iyang Anak nganhi sa kalibutan dili aron ang kalibutan iyang pagahukman sa silot; kondili aron ang kalibutan maluwas pinaagi kaniya.

JUAN 5:24

Sa pagkamatuod, sa pagkamatuod, nagaingon ako kaninyo, Ang nagapatalinghug sa akong pulong, ug nagatoo kaniya nga nagsugo kanako, may kinabuhi nga walay katapusan, ug dili pagahukman sa silot; kondili miagi na gikan sa kamatayon ngadto sa kinabuhi.

I MGA TAGA-CORINTO 2:9

Apan ingon sa nahisulat, Ang wala makita sa mata, ni madungog sa dalunggan, ni mosantop sa kasingkasing sa tawo, ang gikatagana sa Dios alang kanila nga nahigugma kaniya.

I MGA TAGA-TESSALONICA 4:13-18

Apan dili among tinguha, mga igsoon, nga kamo dili mahibalo mahitungod kanila nga mga nangamatay, aron dili kamo managsubo, ingon sa uban nga walay paglaum.

Kay maingon nga kita nagatoo man nga si Jesus namatay ug nabanhaw, maingon man usab sila nga mga nangamatay pagadad-on ra unya sa Dios pinaagi kang Jesus uban kaniya.

Kay kini among ipahayag kaninyo sumala sa pulong sa Ginoo, nga kitang mga buhi nga magapabilin pa hangtud sa pag-abot sa Ginoo dili kita magauna kanila nga mga nangamatay.

Kay ang Ginoo gayud mao ang manaug unya gikan sa langit inubanan og singgit sa pagsugo, ug sa tawag sa punoan sa mga manolunda, ug sa tingog sa trumpeta sa Dios: ug unya ang mga nangamatay diha kang Cristo mouna sa pagpamangon:

Ug kita nga mga buhi pa nga nanghibilin pagasakgawon ngadto sa mga panganod uban kanila, sa pagsugat sa Ginoo diha sa kahanginan: ug sa ingon niini kita magapakig-uban na sa Ginoo sa tanang panahon.

Busa paglinipayay kamo ang usa sa usa pinaagi niining mga pulonga.

Ang Orihinal Nga Kasal-anan

GENESIS 3:1

KARON ANG BITIN MALALANGON
LABI PA KAY SA NGATANAN NGA
MGA MANANAP SA KAPATAGAN NGA
GIBUHAT SA GINOONG DIOS. UG
NAG-INGON SIYA SA BABAYE, DIAY,
NAG-INGON ANG DIOS, DILI KAMO
MAKAKAON SA TANAN NGA MGA
KAHOY SA TANAMAN?

GENESIS 3:6-7

UG SA NAKITA SA BABAYE NGA ANG KAHOY MAAYO NGA KAN-ON,
UG NGA KINI MAKALIPAY SA MGA MATA, UG NGA ANG KAHOY TAKUS
TINGUHAON ARON MAKAPAHIMONG MAKINAADMANON SA TAWO,
MIKUHA SIYA SA BUNGA NIINI, UG MIKAON, UG GIHATAGAN USAB
NIYA ANG IYANG BANA KAUBAN NIYA; UG MIKAON SIYA.

UG NANGABUKA ANG MGA MATA NILANG DUHA, UG SILA
NANGHIBALO NGA SILA MGA HUBO; UG NANAGTAHI SILA SA MGA
DAHON SA HIGUERA, UG NANAGBUHAT OG MGA TAPIS ALANG SA
ILANG KAUGALINGON.

GENESIS 3:14-15

UG ANG GINOONG DIOS NAG-INGON SA BITIN, TUNGOD KAY IKAW
NAGBUHAT NIINI, TINUNGLO IKAW LABI PA KAY SA TANAN NGA
MGA KAHAYOPAN, UG LABAW SA TANAN NGA MGA MANANAP SA
KAPATAGAN; SA IMONG TIYAN MAGAKAMANG KA, UG MAGAKAON
IKAW SA ABOG SA TANAN NGA MGA ADLAW SA IMONG KINABUHI:

UG IBUTANG KO ANG PANAGKAAWAY SA TALIWALA MO UG
SA BABAYE, UG SA TALIWALA SA IMONG KALIWAT UG SA
IYANG KALIWAT; SIYA MAGASAMAD SA IMONG ULO, UG IKAW
MAGASAMAD SA IYANG TIKOD.

Kini mao ang nahaunang kasal-anan nga nasulat diha sa Biblia. Ang pinaka-maliputon sa tanang mananap, ang serpente, “gilimbongan” si Eva sa pagkaon sa usa ka gidili nga bunga. Gikaon niya kini ug dayon gihatag kini ngadto sa iyang bana, nga maoy nagpaamgo kanila nga sila mga hubo.

Ang tin-aw nga mga pangutana maoy: Unsa man pagkahimo nga nakasulti ang bitin? Unsa ma’y kahilambigitan sa mansanas sa pagkahubo? Ug, asa man mohilambigit ang kaliwat sa serpente ngadto niining tanan?

Nagaingon ang Biblia nga ang serpente mao kaniadto ang pinaka “malalangon” sa tanang mga mananap. Sama siya kaayo sa tawo kaniadto, ingon nga siya makalakaw, makasulti, ug mahimo pa gani nga magkaaduna og maalamon nga pagpakig-estorya. Ug human nga gilimbongan niya ang asawa ni Adan, gitunglo siya sa Dios aron mahimong usa ka bitin, apan dili sa wala pa nabuhat ang maong kadaut ug naitanum ang semilya niini.



Nagaingon ang Biblia diha sa Genesis 3:15 nga nagkaaduna ang serpente og kaliwat, ug nagbutang ang Dios og *panagkaaway* tali sa maong duha ka mga kaliwat. Klaro nga, ang binhi sa serpente misagol sa natural nga binhi ni Eva sa wala pa ang pagpahimulag. Unsaon man pagkahimo nianang tanan nga mamahimong resulta sa pagkaon og mansanas? Dayon, sa pipila ka mga bersekulo human niana, "*Gitawag ni Adan ang ngalan sa iyang asawa nga Eva; tungod kay siya mao ang inahan sa ngatanan nga adunay kinabuhi.*" Timan-i nga kini wala nagaingon nga si Adan maoy amahan sa ngatanan nga adunay kinabuhi.

Adunay tulo ka nagkalainlaing "mga bunga" diha sa Biblia. Siyempre, adunay literal nga bunga, sama sa usa ka mansanas, nga nagatubo ug ginakaon ingon nga pagkaon. Aduna usab og bunga nga nagapahinungod ngadto sa atong mga buhat, kini natural man nga mga buhat sama sa pagpanguma ug pagnegosyo, o espirituhanong mga buhat sama sa paghimo og mga milagro ug pagwali sa Maayong Balita. Dayon, aduna usab ang bunga sa tagoangkan, nga nagapahinungod sa pagsamkon ug pagpanganak.

Ang pag-kaon ba og usa ka literal nga bunga mohatag kaha kang Adan ug Eva sa pagsabot nga sila diay hubo? O, kini kaha mokinahanglan og usa ka pisikal nga pagpakig-relasyon tali sa usa ka lalaki ug usa ka babaye aron nga masabtan nila kon ngano nga kinahanglan nilang tabonan ang pipila ka bahin sa ilang lawas?

Unsa ba gyud ang nahitabo niadtong adlawa didto sa maong Tanaman aron nga mahulog ang tibuok katawohan?

Sama nga ang Binhi sa babaye sa literal mao ang pagpahimugso sa Dios sa Iyang Kaugalingon diha sa tawhanong unod, mao usab ang binhi sa serpente nga sa literal mao ang paagi nga nakaplagan ni Satanas nga nahimo niyang ablihan ang pultahan para maisal-ot niya ang iyang kaugalingon ngadto sa tawo. Imposibli kadto para kang Satanas (kay usa ra siya ka GILALANG nga personang-espiritu) nga ipaliwat ang iyang kaugalingon sa pamaagi nga gipahimugso sa Dios ang Iyang Kaugalingon, busa ginaingon sa saysay diha sa Genesis kung giunsa niya kaniadto pagpatungha sa iyang binhi ug pagsal-ot o pagpasulod sa iyang kaugalingon ngadto sa kaliwatan sa tawo. Dumdumon ninyo usab nga si Satanas gitawag kaniadto nga "serpente." Iya kining binhi o ang pagsal-ot niini ngadto sa kaliwatan sa tawo ang maoy atong ginahisgotan. Sa wala pa nagkaaduna niadto si Adan og lawasnon nga pag-ila kang Eva, aduna na niadto ang serpente og niana nga pag-ila una kaniya. Ug kadtong natawo gikan niana mao si Cain. Si Cain iya sa (natawo sa, nga anak sa) nianang "Maong Dautan," I Juan 3:12.

...Ang kamatuoran niini mao nga nagkaaduna si Eva sulod sa iyang tagoangkan og DUHA ka anak nga lalaki (nga kaluha) gikan sa MAGKALAHI nga mga pagmabdos. Nagdala siya kaniadto og mga kaluha, nga ang pagsamkon kang Cain nag-una kay sa kang Abel.

Mga Pakisayran Niini

GENESIS 3:6-7

Ug sa nakita sa babaye nga ang kahoy maayo nga kan-on, ug nga kini makalipay sa mga mata, ug nga ang kahoy takus tinguhaon aron makapahimong makinaadmanon sa tawo, mikuha siya sa bunga niini, ug mikaon, ug gihatagan usab niya ang iyang bana kauban niya; ug mikaon siya.

Ug nangabuka ang mga mata nilanag duha, **ug sila nanghibalo nga sila mga hubo**; ug nanagtahi sila sa mga dahon sa higuera, ug nanagbuhat og mga tapis alang sa ilang kaugalingon.

[Unsaon man nila pagkahibalo nga sila hubo gikan sa pagkaon og usa ka prutas?]

GENESIS 3:13-15

Ug ang GINOONG Dios nag-ingon sa babaye, Unsa kining imong gibuhat? Ug nag-ingon ang babaye, **Ang bitin naglimbong kanako**, ug mikaon ako.

Ug ang GINOONG Dios nag-ingon sa bitin, Tungod kay ikaw nagbuhat niini, tinunglo ikaw labi pa kay sa tanan nga mga kahayopan, ug labaw sa tanan nga mga mananap sa kapatagan; sa imong tiyan magakamang ka, ug magakaon ikaw sa abog sa tanan nga mga adlaw sa imong kinabuhi:

Ug ibutang ko ang **panagkaaway sa taliwala mo ug sa babaye**, ug **sa taliwala sa imong kaliwat ug sa iyang kaliwat**; siya magasamad sa imong ulo, ug ikaw magasamad sa iyang tikod.

[Aduna gyu'y kaliwat ang serpente. Tin-aw nga, dili kini nagapahinungod sa usa ka halas.]

GENESIS 3:20

Ug gitawag ni Adan ang ngalan sa iyang asawa nga Eva; tungod kay siya **mao ang inahan sa ngatanan nga adunay kinabuhi**.

[Nganong wala man gitawag si Adan ingon nga amahan sa ngatanan nga adunay kinabuhi?]

GENESIS 4:1-2

Ug giila ni Adan si Eva nga iyang asawa; ug kini nanamkon, ug nag-anak kang Cain, ug miingon, **Nakabaton ako og usa ka lalaki tungod sa panabang sa GINOO**.

Ug unya usab nag-anak siya kang Abel nga iyang igsoon. Ug si Abel magbalantay sa mga carnero, apan si Cain mag-uuma sa yuta.

[Ang tanang kinabuhi nagagikan sa Dios, natawo man kini nga lehitimo o ilehitimo. Dili arang nga makalalang og kinabuhi si Satanas.]

LUCAS 3:38

Nga anak ni Enos, nga anak ni **Set**, nga anak ni **Adan**, nga anak sa Dios.

[Asa na man diay ang panganay nga si Cain diha sa kaliwatan ni Adan?]

I JUAN 3:12

Ug dili manginsama kang **Cain**, nga iya sa **dautan**, ug nga nagpatay sa iyang igsoon. Ug nanong gipatay man niya siya? Tungod kay **dautan man ang iyang kaugalingon nga binuhatan**, ug matarung man ang sa iyang igsoon.

[Gibuhat sa Dios si Adan diha sa kaugalingon Niyang dagway. Asa man nagagikan ang kadautan ni Cain, ug asa man nagagikan ang kamatarung ni Abel? Gipanunod lang nila ang ilang mga kinaiyahan gikan sa ilang mga amahan.]

JUDAS 1:14

Labot pa usab si Enoc, **ang ikapito gikan kang Adan**, mitagna mahatungod niini kanila, nga miingon, Ania karon, nagaabot ang Ginoo uban sa iyang mga dagkung panon sa iyang mga balaan,

[Wala ni usa ka dapit sa Biblia nga si Cain makita diha sa kaliwatan ni Adan.]



Ang Makalilisang Nga Adlaw Sa Ginoo

MALAQUIAS 4:1

KAY, ANIA KARON, ANG ADLAW

MOABOT NA, NGA NAGASUNOG DAW

HUDNO...

MALAQUIAS 4:5-6

ANIA KARON, AKONG IPADALA KANINYO SI ELIAS ANG MANALAGNA SA DILI PA MOABOT ANG DAKU UG MAKALILISANG NGA ADLAW SA GINOO:

UG IYANG PABALIKON ANG KASINGKASING SA MGA AMAHAN NGADTO SA MGA BATA, UG ANG KASINGKASING SA MGA BATA NGADTO SA ILANG MGA AMAHAN, TINGALI UNYA AKO MOANHI UG SAMARAN KO ANG YUTA PINAAGI SA USA KA PANGHIMARAUT.

Ginasaad sa kaulahiang Libro diha sa Daang Tugon ang pagkagun-ob sa kalibutan. Apan sa dili pa ang katapusan, ang propeta nga si Elias gitagna nga mobalik ug ipaila ang Mesias. Nagaingon ang uban nga kini nga propesiya natuman na kang Juan nga Bautista.

Duha ka libo ka tuig kaniadto, nagpaabot na ang mga Judio sa pag-abot sa Mesias. Nasayod sila nga nagpropesiya si Malaquias mahitungod sa usa ka tawo nga adunay espiritu ni Elias nga mao ang magpaila kanila sa Mesias. Apan sa dihang miabot si Juan nga Bautista, dili siya ang gipaabot nila nga mao ang mamahimong Elias. Sa diha nga gipangutana nila si Jesus kon ngano nga wala una miabot si Elias, klaro Niyang gisultihan sila nga si Juan mao ang katumanan nianang propesiya: *“Ug kung buot kamo magdawat kaniya, siya mao kadtong Elias, nga umalanhi.”*



Gamay ra nga pundok sa mga tawo kaniadto ang nakadawat sa niini nga kapadayagan. Para sa kadaghanang mga relihiyosong lider kaniadto, usa lamang si Juan ka madasigon kaayo nga kritiko sa ilang mga organisasyon. Dili lang nga wala nila giila ang mao nga espiritu ni Elias, kondili ang grabe pa niini, ila usab wala nahibal-an ang Pag-abot ni Cristo.

Busa natuman ba diha kang Juan nga Bautista ang propesiya ni Malaquias? Dili tanan.

Una sa tanan, ang kalibutan wala pa “nasunog nga daw hudno,” busa nahibalo kita nga mahitabo pa lang ang uban nga bahin sa Malaquias 4. Ang usa pa ka bahin sa maong Kasulatan nga wala kaniadto natuman diha kang Juan mao ang, “pagpabalik sa kasingkasing sa mga bata ngadto sa ilang mga amahan.” Ug, si Jesus, Mismo, ang nagpropesiya nga si Elias (sa umalabot) magaabot ug magapahauli sa tanang mga butang. (Mat 17:11)

Busa kinahanglan diay kita magpaabot kang Elias sa dili pa ang Ikaduhang Pag-abot ni Cristo!

Karon, sa niining modernong panahon, panahon na para sa Ikaduhang Pag-abot ni Ginoong Jesus. Gikasaad kanato pag-usab, nga ang espiritu ni Elias ang maoy magapaila Kaniya nganhi kanato sumala sa Malaquias 4. Apan unsa man diay nga pundok sa mga tawo ang makaila kang Elias pagmoabot na siya? Kadto lamang ang mga nagapaabot kaniya.

Mahinumduman nato kini nga mga Pulong sa atong Ginoo ug Manluluwas pagmahunahuna nato ang propesiya ni Malaquias alang sa niining patapos na nga mga oras sa panahon:

Apan nagaingon ako kaninyo, Nga si Elias nahianhi na, ug wala nila hiilhi... Mateo 17:12



Unsa na lang kung dili nato mahibal-an ang pag-abot ni Elias? Kung ingon-ana ba’y masipyatan usab nato ang Ikaduhang Pag-abot ni Cristo, sama sa mga escriba ug mga Fariseo kaniadto nga nasipyatan nila ang maong Unang Pag-abot tungod kay wala nila naila si Juan nga Bautista?



Mga Pakisayran Niini

II MGA HARI 2:15

*Ug sa pagkakita kaniya sa mga anak nga lalaki sa mga manalagna nga didto sa Jerico atbang kaniya, sila ming-ingon, **Ang espiritu ni Elias nagapuyo kang Eliseo.** Ug sila nangadto sa pagtagbo kaniya, ug mingyukbo sa ilang kaugalingon sa yuta sa atubangan niya.*

ISAIAS 40:3-4

Ang tingog sa usa nga nagasinggit, Andama ninyo sa kamingawan ang dalan sa GINOO, himoang patag sa kamingawan ang usa ka halapad nga dalan alang sa atong Dios.

Ang tagsatagsa ka walog pagabayawon, ug ang tagsatagsa ka bukid ug bungtod pagapaubson: ug ang dili patag pagahimoong patag, ug ang mga dapit nga gansangansangon mapatag: [si Juan Bautista]

MALAQUIAS 3:1

*Ania karon, ako nagapadala sa akong sinugo [si Juan nga Bautista], ug siya **magaandam sa dalan sa atubangan ko:** ug ang Ginoo, nga inyong gipangita, moabot sa hinanali sa iyang templo, ug ang sinugo sa tugon, si kinsa inyong gitinguha: ania karon, siya moabot na, nagaingon ang GINOO sa mga panon.*

MALAQUIAS 4:1-6

*Kay, **ania karon, ang adlaw moabot na, nga nagasunog daw hudno** [wala pa kini nahitabo]; ug ang tanang mga palabilabihon, oo, ug ang tanang nanagbuhat sa kadautan, mangahimong tuod sa balili: ug ang adlaw nga moabot magasunog kanila, nagaingon ang GINOO sa mga panon, nga kini dili magbilin kanila bisan gamut ni sanga.*

Apan kaninyo nga may kahadlok sa akong ngalan ang Adlaw sa pagkamatarung mosubang nga adunay kaluwasan sa iyang mga pako; ug kamo manggula, ug managhlumpat sa kalipay maingon sa mga nating vaca sa toril.

Ug pagatamaktamakan ninyo ang mga dautan; kay sila mangahimong abo sa ilalum sa mga lapa-lapa sa inyong mga tiil sa adlaw nga akong pagahimoon kini, nagaingon ang GINOO sa mga panon. Hinumdumi ninyo ang kasugoan ni Moises ang akong alagad, nga akong gisugo kaniya didto sa Horeb alang sa tibuok nga Israel, bisan ang kabalaoran ug ang mga tulomanon.

*Ania karon, **akong ipadala kaninyo si Elias ang manalagna sa dili pa moabot ang daku ug makalilisang nga adlaw sa GINOO:***

*Ug iyang **pabalikon ang kasingkasing sa mga amahan ngadto sa mga bata** [si Juan nga Bautista], ug ang **kasingkasing sa mga bata ngadto sa ilang mga amahan** [ang pang-karon nga Elias], tingali unya ako moanhi ug samaran ko ang yuta pinaagi sa usa ka panghimaraut.*

MATEO 11:10

***Kay siya, mao ang hingtungdan sa nahasulat, Ania karon, igapadala ko ang akong magsasangyaw nga magauna kanimo, siya mao ang magaandam sa imong dalan sa atubangan mo.** [Malaquias 3:1, si Juan nga Bautista]*

MATEO 11:14

***Ug kung buot ninyo magdawat kaniya, siya mao kadtong Elias, nga umalanhi.** [si Juan nga Bautista]*

MATEO 17:11-12

*Ug sa mitubag si Jesus ug nag-ingon kanila, **Oo matuod nga si Elias moanhi, ug magapahauli sa tanang mga butang.** [Ang pang-karon nga Elias]*

*Apan nagaingon ako kaninyo, **Nga si Elias nahianhi na, ug wala nila hiilhi, apan gibuhath kaniya ang tanan nga buot nilang pagabuhaton. Ingon man usab ang Anak sa tawo pagapaantuson nila.** [si Juan nga Bautista]*

LUCAS 1:17

Ug siya magauna kaniya diha sa espiritu ug sa gahum ni Elias, aron sa pagpabalik sa mga kasingkasing sa mga amahan ngadto sa mga anak, ug sa mga masupilon ngadto sa kaalam sa mga matarung; aron sa pagtagana alang sa Ginoo usa ka katawhan nga inandam. [si Juan nga Bautista]

ANG PULONG

MGA HEBREOHANON 4:12

KAY ANG PULONG SA DIOS BUHI,
UG NAGALIHOK NGA GAMHANAN,
LABI PANG MAHAIT KAY SA ESPADA
NGA DUHAY SULAB, UG MODULOT
NGADTO SA GITAGBOAN SA KALAG
UG ESPIRITU, UG SA MGA LUTAHAN
UG SA MGA KAUYOKAN, UG
MOTUGKAD SA MGA HUNAHUNA
UG KATUYOAN SA KASINGKASING.

Sa kadaghan sa mga doktrina, mga denominasyon, ug mga kulto sa niini karon nga kalibutan, asa kaha niini moangay ang tinuod nga magtotoo? Kung si Pedro, si Santiago, ug si Juan ania karon sa kalibutan, unsa kaha nga denominasyon sila mopasakup? Monunot pa kaha sa gihapon ang mga milagro diha sa ilang ministerio o ipahayag ba nila nga dugay nang nangagi ang ingon nianang mga adlaw? Makig-kompromiso ba sila sa bautismo? Sundon ba nila ang doktrina sa ilang iglesia bisan nga medyo simang kini sa Pulong? Toohan ba nila ang Biblia, o toohan nila ang mga Fariseo ug mga Saduceo sa karong panahon?

Ipangutana sa imong kaugalingon kini nga pangutana: Kung ania si Jesus Cristo sa karon, igasalikway mo ba ang tanan-tanan aron lang nga sundon Siya? Toohan mo ba ang Iyang Pulong?

Gikahatagan ka Niya og mao rang kahigayonan nga gihatag Niya sa Iyang mga tinun-an kaniadto. Iyang

gibutang diha sa imong kamot kini nga gamay'ng sinulat aron nga itudlo ka pabalik ngadto sa Iyang Pulong, sa Iyang Biblia. Makig-kompromiso ka ba?

Mga kalalaken-an ug mga kababayen-an, mga higala, nahibalo ba kamo nga ang Dios sa Langit nga nagbanhaw kang Cristo Jesus gikan sa mga patay, dili Siya patay kondili Siya'y buhi. Ug kung gituman Niya ang Iyang Pulong kang David, kung gituman Niya kini kang Elias, kung gituman Niya kini kang Moises, kung gituman Niya kini ngadto sa Hebreohanong mga anak, kung gituman Niya kini kang—kang Daniel, pagatumanon Niya kini kaniyo ug kanako.



**GUSTO MO BA ANG DUGANG PA NGA
KAHIBALO?**

www.angmensahe.org

o

VOICE OF GOD RECORDINGS
019 ST. MARY ST., BARANGAY E. RODRIGUEZ SR.
CUBAO, QUEZON CITY, METRO MANILA, PHILIPPINES



ANG TINAGO SA DIOS

PINADAYAG 10:7

www.angmensahe.org

VOICE OF GOD RECORDINGS
019 ST. MARY ST., BARANGAY E. RODRIGUEZ SR.
CUBAO, QUEZON CITY, METRO MANILA, PHILIPPINES

CEBUANO